

大般涅槃經

法顯譯

妙諦法音

2024 年 8 月 25 日

南無本師釋迦牟尼佛

自歸於佛 當願眾生 紹隆佛種 發無上意

自歸於法 當願眾生 深入經藏 智慧如海

自歸於僧 當願眾生 統理大眾 一切無礙

大般涅槃經

如是我聞：一時，佛在毘耶離大林中重閣講堂。

與大比丘眾，千二百五十人俱。

爾時，世尊而與阿難，於晨朝時，著衣持鉢，入城乞食。還歸所止，食竟洗漱，收攝衣鉢。告阿難言：汝可取我尼師壇來，吾今當往遮波羅支提，入定思惟。作此言已。

即與阿難，俱往彼處。既至彼處，阿難即便敷尼師壇。

於是，世尊結跏趺坐，寂然思惟。

阿難，爾時，去佛不遠，亦於別處，端坐入定。

世尊，須臾，從定而覺。告阿難言：此毘耶離，優陀延支提、瞿曇支提、菴羅支提、多子支提、娑羅支提、遮波羅支提，此等支提，甚可愛樂。

阿難！四神足人，尚能住壽滿於一劫若減一劫。如來今者，有大神力，豈當不能住壽一劫若減一劫？

爾時，世尊既開如是可請之門，以語阿難。阿難默然，而不覺知。世尊乃至殷懃三說，阿難茫然，猶不解悟，不請如來：「住壽一劫若減一劫，利益世間諸天人民。」所以者何？其為魔王所迷惑故。

爾時，世尊三說此語，猶見阿難心不開悟，即便默然。

爾時，魔王來至佛所，而白佛言：世尊！今者，宜般涅槃。善逝！今者，宜般涅槃。所以者何？我於往昔，在尼連禪河側，勸請世尊入般涅槃。世尊爾時而見答言：「我四部眾，比丘、比丘尼、優婆塞、優婆夷，猶未具足，又未降

伏諸餘外道。所以未應入般涅槃。」世尊今者，四部之眾，無不具足，又已降伏諸餘外道。所為之事，皆悉已畢。今者，宜應入般涅槃。

于時，魔王如是三請。

如來即便答言：善哉！我於往昔在尼連禪河側，已自許汝，以四部眾未具足故，所以至今。今已具足。却後三月，當般涅槃。

是時，魔王聞佛此語，歡喜踊躍，還歸天宮。

爾時，世尊即便捨壽，而以神力住命三月。

是時，大地十八相動，天鼓自鳴。以佛力故，空中唱言：「如來不久，當般涅槃。」諸天人眾，忽聞此聲。心大悲惱，遍體血現。

是時，世尊即於彼處，而說偈言：

一切諸眾生 皆隨有生死 我今亦生死 而不隨於有
一切造作行 我今欲棄捨

爾時，世尊說此偈已，默然而住。

是時，阿難見大地動，心大驚怖。而自念言：今者，何故忽有是相？如此之事，非為小緣。我今當往諮問世尊。

作此念已，即從座起，到於佛前，頭面禮足。白言：世尊！我向於彼，別處思惟。忽見大地十八相動，又聞空中天鼓之聲，心大怖懼。不知此相，是何因緣？

佛言：阿難！大地震動，有八因緣：

- ①大地依於水住。又，此大水依風輪住。又，此風輪依虛空住。空中有時，猛風大起，吹彼風輪，風輪既動，彼水亦動，彼水既動，大地乃動；
- ②比丘、比丘尼、優婆塞、優婆夷，有修神通始成就者，欲自試驗，故大地動；
- ③菩薩在兜率天，將欲來下，降神母胎，故大地動；

- ④菩薩初生，從右脅出，故大地動；
- ⑤菩薩捨於王宮，出家學道，成一切種智，故大地動；
- ⑥如來成道，始為人天轉妙法輪，故大地動；
- ⑦如來捨壽，以神通力住命而住，故大地動；
- ⑧如來般涅槃時，故大地動。

阿難！當知地動因緣，有此八事。

阿難！有八部眾：①剎利、②婆羅門、③長者居士、④沙門、⑤四天王、⑥忉利天、⑦魔王、⑧梵王。此八部眾，我觀其根，應得度者，隨所現形，而為說法。彼亦不知是我所說。

阿難！有八勝處：

①內有色想，外觀色少境界；②內有色想，外觀色無量境界；③內無色想，外觀色少境界；④內無色想，外觀色無量境界；⑤觀一切色青；⑥觀一切色

黃；⑦觀一切色赤；⑧觀一切色白。

此是行者上勝之法。

復次，阿難！有八解脫：

①內有色想，外觀色；②內無色想，外觀色；③不淨思惟，淨解脫；④空處解脫；⑤識處解脫；⑥無所有處解脫；⑦非想非非想處解脫；⑧滅盡定解脫。

此亦復是行者勝法。

若能究竟此等法者，即於諸法，自在無礙。

阿難！知不，我於往昔，初成道時，度優樓頻螺迦葉。在尼連禪河側，爾時魔王，來至我所，而請我言：「世尊！今者，宜般涅槃。善逝！今者，宜般涅槃。何以故？所應度者，皆悉解脫。今者，正是般涅槃時。」如是三請，我即答言：「今者，未是般涅槃時。所以者何？我四部眾，未具足故。所應度者，皆未究竟。諸外道眾，又未降伏。」如是三答，魔王聞已，心懷愁惱，即還天

宮。向者，又來，而請我言：「世尊！今者，宜般涅槃。善逝！今者，宜般涅槃。所以者何？我於往昔，在尼連禪河側，勸請世尊，而般涅槃。世尊爾時即答我言：『我四部眾，比丘、比丘尼、優婆塞、優婆夷，猶未具足。又，未降伏諸餘外道。是以未應入般涅槃。』世尊！今者，四部之眾，無不具足。又，已降伏諸餘外道。所為之事，皆悉已畢。今者，宜應入般涅槃。」魔王乃至如是三請。我即答言：「我於往昔，在尼連禪河側，已自許汝。以四部眾未具足故，所以至今。今已具足。却後三月，當般涅槃。」魔王聞我作此語已，歡喜踊躍，還歸天宮。我既於此受魔請已，即便捨壽，住命三月。以是因緣，大地震動。

爾時，阿難聞佛此語，心大悲惱，遍體血現，涕泣流淚。而白佛言：惟願，世尊！哀愍我等，住壽一劫若減一劫，利益世間諸天人民。如是三請。

爾時，世尊告阿難言：汝今非是請如來時。所以者何？我已許魔「却後三月

當般涅槃」，汝今云何而請住耶？阿難！汝侍我來，頗曾聞我說二言不？

阿難白佛：實不曾聞天人之師有二言也。我於往昔曾聞，世尊為四部眾，而說法言：「四神足人，則能住壽，滿足一劫若減一劫。」況復如來，無量神力自在之王！今更不能住壽一劫若減一劫，而便捨壽，住命三月。惟願，世尊！哀愍我等，住壽一劫若減一劫。

爾時，世尊答阿難言：我今所以便捨壽者，正由汝故。所以者何？我前於此向汝說言：「四神足人，尚能住壽，滿足一劫若減一劫。如來今者有大神力，豈當不能住壽一劫若減一劫。」乃至如是慇懃三說，開勸請門，而汝默然，曾不請我「住壽一劫若減一劫」。是故，我今住命三月，汝今云何方請我住！

爾時，阿難聞佛此語，決定知「佛入般涅槃」，不可勸請。心生苦痛，悶絕懊惱，泣涕流漣，不能自勝。

爾時，世尊既見阿難生大苦惱，而以梵音安慰之言：阿難！汝今勿生憂悲，

有為之法，皆悉如是。一切合會，無不別離。

世尊即便，而說偈言：

一切有為法 皆悉歸無常 恩愛和合者 必歸於別離

諸行法如是 不應生憂惱

於是，阿難流淚而言：天人之師，無上大尊，不久應當入般涅槃。我今云何而不憂惱？即便拍頭，高聲唱言：嗚呼！苦哉！世間眼滅！眾生不久，失於慈父！

爾時，世尊又告阿難：汝今不應生於憂惱。設住一劫若減一劫，會亦當滅。有為之法，性相如是。汝勿於我，獨生苦也。我今欲還重閣講堂，汝可取我尼師壇來。

於是，世尊即與阿難俱，共還歸重閣講堂。

爾時，世尊告阿難言：汝今可語此大林中重閣講堂諸比丘眾，皆悉令往大集

講堂。

阿難奉敕，即便普語諸比丘眾：世尊皆令往大集堂。

比丘集已。阿難白佛：諸比丘眾，悉皆已集。惟願，如來！自知其時。

爾時，如來從重閣講堂，往大集堂，敷座而坐。告諸比丘：我昔為汝所說諸法，常思惟之，誦習勿廢。淨修梵行，護持禁戒，福利世間諸天人民。

諸比丘！我昔為汝說何等法，汝思惟之，勿生懈怠。三十七道品法，所謂：四念處、四正勤、四如意足、五根、五力、七覺支、八聖道分。汝應修習，精勤思惟。此法，能令到解脫處。

復次，比丘！一切諸法，皆悉無常。身命危脆，猶如驚電。汝等不應生於放逸。汝等當知：「如來不久，却後三月，當般涅槃。」

爾時，世尊即說偈言：

我欲棄捐此 朽故之老身 今已捨於壽 住命留三月

所應化度者	皆悉已畢竟	是故我不久	當入般涅槃
我所說諸法	則是汝等師	頂戴加守護	修習勿廢忘
汝等勤精進	如我在無異	生死甚危脆	身命悉無常
常求於解脫	勿造放逸行	正念清淨觀	善護持禁戒
定意端思惟	攝情於外境	若能如此者	是則護正法
自到解脫處	利益諸天人		

爾時，諸比丘聞佛此語，心大苦痛，涕泣交流，遍體血現，迷悶懊惱。而白佛言：世尊！惟願住壽，勿般涅槃，利益眾生，增長人天。惟願住壽，勿般涅槃，開諸眾生智慧之眼。一切眾生墮於黑暗，惟願如來為作明照。一切眾生皆悉漂沒生死大海，惟願如來為作舟航。

舉手拍頭，搥胸大叫：嗚呼！苦哉！如來不久當般涅槃。一切眾生，何所歸依？

爾時，世尊告諸比丘：一切諸法，皆悉無常。恩愛合會，無不別離。汝等不應請我住世。何以故？今者，非是勸請我時。向為汝等略說法要，當善奉持如我無異。

日既晚暮，世尊即與阿難俱共還歸重閣講堂。

爾時，世尊既至明旦，著衣持鉢，而與阿難入城乞食。既得食已，即便還歸重閣講堂，食訖澡漱。與諸比丘往乾茶村，路經毘耶離城。世尊迴顧，向城而笑。

阿難即便頭頂禮足，而問佛言：無上大尊非無因緣而妄笑也。

佛即答言：阿難！我今所以向城笑者，正為最後見此城故。

當於如來說此言時，虛空之中，無雲而雨。

於是，阿難復白佛言：世尊！甚為奇特！虛空清淨，無有氣翳，忽然而降如此密雨。

佛告阿難：汝知之不，虛空諸天，聞我說言最後見於毘耶離城，心大懊惱，悲感涕泣。此是天淚，非為雨也！

爾時，阿難及諸比丘，聞佛此語，心復悲惱，悶絕躃地。而白佛言：今者，天人極大苦痛。世尊云何而欲委捨般涅槃耶？

爾時，如來即以梵音而安慰之：汝等不應生於憂苦。

諸比丘言：世尊今者最後見於毘耶離城，不久便當入般涅槃。我等云何而不憂苦！

如是展轉，人人相告。乃至聲徹諸離車等。

時，諸離車聞此語已，心懷悲惱，遍體血現，舉手拍頭，搥胸大叫：嗚呼！苦哉！世間眼滅。眾生於今，無所歸依。互相語言：我等今者，應往佛所，勸請世尊：「住毘耶離，住壽一劫若減一劫，利益世間諸天人民。」

即便嚴駕，疾往佛所。既出城門，遙覩如來。又見阿難，及諸比丘，涕泣流

漣，悶絕懊惱。諸離車等倍增悲慟，前詣佛所，頭面禮足，而白佛言：世尊今者欲般涅槃，一切眾生失智慧眼，方當在於黑暗之中，云何能見所應行處？惟願，世尊！住壽一劫若減一劫。如是三請。

佛即答言：有為之法，皆悉無常，設住一劫若減一劫，亦歸無常。

爾時，如來即說偈言：

須彌雖高廣	終歸於消磨	大海雖淵曠	會亦還枯竭
日月雖明朗	不久則西沒		
大地雖堅固	能負荷一切	劫盡業火然	亦復歸無常
恩愛合會者	必歸於別離		
過去諸如來	金剛不壞身	亦為無常遷	今我豈獨異
諸佛法如是	汝等不應請	勿偏於我上	而更生憂惱

爾時，世尊說此偈已，告諸離車：汝等可止啼泣之情，諦聽如來最後所說。

諸離車言：善哉！世尊！願樂欲聞。

於是，如來敷尼師壇，結跏趺坐。諸比丘眾，及以離車，強自抑忍，各坐一面。

爾時，世尊告離車言：汝等當知，有七種法，日就增進，而不減損：①歡悅和同，無相違逆；②共相曉悟，講論善業；③護持禁戒，及持禮儀；④恭敬父母及餘尊長；⑤親戚和睦，各相承順；⑥國內支提，修理供養；⑦奉持佛法，親敬比丘及比丘尼，愛護優婆塞及優婆夷。

如是七法，若受行者，令人威德，日就增進。國土熾盛，人民豐樂。汝等從今，至盡形壽，當奉持之，無得懈怠。

時，諸離車即白佛言：我等若於此七法中，修行一事，尚能令我威德增進，況復具足修行七法！善哉！世尊！我等今者，便得福利，當盡形壽奉持不忘。

爾時，世尊告諸比丘：汝等從今，亦當修習七法之行：①歡悅和諧，猶如水

乳；②常共集會，講論經法；③護持禁戒，不生犯想；④恭敬於師及以上座；⑤料理愛敬阿練比丘；⑥勸化檀越，修營三寶所止住處；⑦勤加精進，守護佛法。

汝等！當知若有比丘行此七法，功德智慧，日就增進。

復次，比丘！更有七法，汝等當修：①不如白衣營資生業；②不作戲論調謔之言；③不樂睡眠廢於精勤；④不論世間無益之事；⑤遠惡知識，近於善友；⑥正念，不生邪想；⑦若於佛法有所得者，更求勝進。

汝等！若能行此七法，功德智慧日就增長。

復次，比丘！更有七法，汝等當行：①於佛法僧，生堅固信；②有慚；③有愧；④心常樂於多聞；⑤心不輕躁；⑥樂聞經義；⑦樂修智慧。

汝等！若能修此七法，功德智慧日就增長。

復次，比丘！更有七覺意法，汝等當行：①擇法、②精進、③喜、④念、⑤

定、⑥猗、⑦捨。

汝等！若能行此七法，功德智慧日就增長。

復次，比丘！更有七法：①觀於無常、②觀於無我、③觀於不淨、④觀苦、⑤不樂世間、⑥不著五欲、⑦勤修寂滅。

汝等！若能行此七法，功德智慧日就增長。

復次，比丘！更有七法，汝等當行：①身常行慈；②口常行慈；③意常行慈；④若有檀越種種布施，平等分與，無使有偏；⑤於深妙法，樂說不厭；⑥不以世間典籍而教於人；⑦見非同學，不生憎嫉。

汝等！若能修此七法，功德智慧日就增長。

復次，比丘！更有七法，汝等當行：於九部法，①善能分別；②善解其義；③行道、誦習，皆得其時；④行住坐臥，善得儀中；⑤為人說法，並自量忖，以其所長而以教人；⑥若婆羅門、剎利、長者居士，來欲聽法，當善籌量，隨

根為說；⑦善別愚智。

汝等！若能行此七法，功德智慧日就增長，則能守護我之正法。

爾時，國中，諸離車妻，聞「佛不久當般涅槃，今者最後見毘耶離。」心大懊惱，悲泣流漣。各與五百眷屬，各辦五百乘車，載供養具，種種莊嚴，車牛白者，懸素幡蓋。如是玄黃，各隨牛色，次第出城，往至佛所。

爾時，世尊遙見彼來，告諸比丘：汝等見此諸離車妻前後導從，極嚴麗不？

比丘答言：唯然，見之。

佛告比丘：此毘耶離離車長者，及以其妻，出入之儀，甚為光飾，與忉利天等無異也。

時，離車妻既到佛所，頭面禮足，悲泣流漣，不能自勝。以諸供具，而供養佛。白言：世尊！惟願住壽教化眾生。世尊！今若般涅槃者，我等盲瞶，永無開悟。受生薄福，為此女身，恒有限礙，不得自在，無緣而數親近世尊。世尊

便欲般涅槃者，我等善根日就減損。

爾時，如來而答之言：汝等從今，至盡形壽，精勤持戒，如人護眼；意念端直，勿生諂嫉。此便即是常得見我。

諸離車妻聞佛此語，倍增悲絕，不能自勝，却坐一面。

爾時，菴婆羅女，顏容端正，世界第一，聞「佛不久當般涅槃，最後見於毘耶離城。」心懷悲懊，涕泣交流，即與五百眷屬，嚴五百乘車，次第出城，往詣佛所。

爾時，世尊！遙見彼來，告諸比丘：菴婆羅女今來詣我。形貌殊絕，舉世無雙。汝等皆當端心正念，勿生著意。

比丘！當觀此身，有諸不淨。肝、膽、腸、胃、心、肺、脾、腎、屎、尿、膿、血，充滿其中，八萬戶虫居在其內。髮毛爪齒，薄皮覆肉，九孔常流，無一可樂。又復此身根本始生，由於不淨。此身所可往來之處，皆悉能令不淨流

溢。雖復飾以雕綵，熏以名香，譬如寶瓶中藏臭穢。又其死時，臃脹腐爛，節節支解，身中有虫，而還食之，又為虎狼鷄梟鵩鷲之所吞噬。世人愚癡，不能正觀，戀著恩愛，保之至死，橫於其中而生貪欲。何有智者，而樂此耶？

爾時，世尊即說偈言：

雖復佩瓔珞 香花自嚴飾 屎尿及唾洩 不淨藏其內
眾生保惜之 迷惑不覺悟 猶如灰覆火 愚人蹈其上
智者當遠離 勿生染著心

爾時，菴婆羅女到於佛前，頭面禮足，以諸供具，而供養佛。銜淚嗚咽，而白佛言：惟願，世尊！住壽住世，不般涅槃，利益世間諸天人民！世尊若定般涅槃者，一切眾生無復獎導，猶如嬰兒失於慈母。

爾時，世尊而告之言：一切諸行，性相如是，汝今不應生於悲惱。

世尊即便普為來眾，而說法言：汝等從今護持禁戒，勿得虧犯。破戒之人，

天龍鬼神所共憎厭！惡聲流布，人不喜見。若在眾中，獨無威德。諸善鬼神，不復守護。臨命終時，心識怖懼，設有微善，悉不憶念。死即隨業受地獄苦，經歷劫數，然後得出，復受餓鬼、畜生之身，如是輪轉，無解脫期。比丘！持戒之人，天龍鬼神所共恭敬，美聲流布，聞徹世間。處大眾中，威德明盛。諸善鬼神，常隨守護。臨命終時，正念分明，死即生於清淨之處。

當於如來說此法時，六萬八千那由他天人八部，遠塵離垢，得法眼淨。六十比丘，漏盡意解，成阿羅漢。

爾時，世尊告諸離車及與其妻，并菴婆羅女：我今欲進乾茶村中，汝等可各還歸所止。當知：諸行皆悉無常。但當修行我所說法，勿如嬰兒涕泣悲惱。

世尊即便從座而起。

時，諸離車及與其妻、菴婆羅女，聞佛此言，搥胸拍頭，號咷大叫，緣路隨佛，不肯旋返。

世尊既見戀慕情深，非是言辭所可安慰，即以神力，化作河水，涯岸深絕，波流迅疾。

時，諸離車及以眷屬、菴婆羅女，既見如來與比丘眾在彼河岸，倍增悲慟，悶絕躡地，而以微聲，共相謂言：是處，那忽有此大河，而復乃爾波湍驚急？當是如來見於我等隨從不捨，而故作此，絕行道耳！

時，諸離車及以其妻、菴婆羅女，既不得度，心倍踊躍，俛仰哽咽，絕望乃還。

爾時，如來至乾茶村北林中住，告諸比丘：汝等！當知有四種法：①戒、②定、③慧、④解脫。若不聞知此四法者，斯人長夜在生死海。我於往昔，若不聞知此四法者，不能疾得阿耨多羅三藐三菩提。

於是，世尊即說偈曰：

戒定慧解脫 我若不久聞 不能疾得證 無上正真道

汝等宜精進 修習此四法 能斷生死苦 天人上福田

爾時，世尊說此偈已，為諸比丘分別廣說此四法義。當於如來說此法時，千二百比丘，即於諸法，漏盡意解，成阿羅漢。

爾時，世尊與諸比丘，即從座起，趣於象村、菴婆羅村、閻浮村，乃至到於善伽城。到彼城已，與諸比丘，前後圍繞，在一處坐。

於是，世尊告諸比丘：有四聖諦，當勤觀察：①苦諦、②集諦、③滅諦、④道諦。

比丘！苦諦者，所謂八苦：①生苦、②老苦、③病苦、④死苦、⑤所求不得苦、⑥怨憎會苦、⑦愛別離苦、⑧五受陰苦。汝等！當知此八種苦及有漏法，以逼迫故，諦實是苦。

集諦者，無明及愛，能為八苦而作因本。當知此集，諦是苦因。

滅諦者，無明、愛滅，絕於苦因。當知此滅，諦實是滅。

道諦者，八正道：①正見、②正念、③正思惟、④正業、⑤正精進、⑥正語、⑦正命、⑧正定。此八法者，諦是聖道。

若人精勤，觀此四法，速離生死，到解脫處。汝等比丘！若於此法，已究竟者，亦當精勤為他解說。我若滅後，汝等亦應勤思修習。

當於如來說此法時，五百比丘漏盡意解，成阿羅漢。虛空諸天，其數四萬，於諸法中，遠塵離垢，得法眼淨。

爾時，世尊告諸比丘：有四決定說：

①若有比丘樂欲說法，作如是言：「我親從佛聞如是法，善解其義，受持讀誦，極自通利。」汝等宜應，請之令說，應隨所聞，善自思惟：「為修多羅、為是毘尼，法相之中，有此法耶？」若修多羅，及以毘尼，法相之中有此法者，宜應受持，稱讚善哉。若修多羅，及以毘尼，法相之中，無此法者，不應受持，亦勿稱讚。當知此法，非我所說。

- ②若有比丘樂欲說法，作如是言：「我於某處比丘僧眾，聞如是法，善解其義，受持讀誦，極自通利。」汝等宜應請之令說，隨所聞法，善自思惟：「為修多羅、為是毘尼，為是法相，有此法耶？」若修多羅，及以毘尼，法相之中，有此法者，宜應受持，稱讚善哉。若修多羅，及以毘尼，法相之中，無此法者，不應受持，亦勿稱讚。當知此法，非我所說，亦復非彼比丘眾說。
- ③若有比丘樂欲說法，作如是言：「我親從彼某僧伽藍、某阿練若住處，眾多上座比丘，悉皆多聞，聰明智慧，聞如是法，善解其義，受持讀誦，極自通利。」汝等宜應，請之令說，應隨所聞，善思惟之：「為修多羅、為是毘尼，為是法相中，有此法耶？」若修多羅、及以毘尼，法相之中，有此法者，宜應受持，稱讚善哉。若修多羅，及以毘尼，法相之中，無此法者，不應受持，亦勿稱讚。當知此法，非我所說。

④若有比丘樂欲說法，作如是言：「我親從某僧伽藍某阿練若住處有一上座比丘，智慧多聞，聞如是法，善解其義，受持讀誦，極自通利。」汝等宜應請之令說，應隨所聞，善思惟之：「為修多羅、為是毘尼，為法相中，有此法耶？」若修多羅，及以毘尼，法相之中，有此法者，宜應受持，稱讚善哉。若修多羅，及以毘尼、法相之中，無此法者，不應受持，亦勿稱讚。當知此法，非我所說。

汝等宜應善分別此四決定說，又亦以此分別說法，傳授餘人。設我在世，及般涅槃，虛偽真實，以此知之。

時，諸比丘而白佛言：善哉！世尊！我等從今，當能分別佛說魔說。

爾時，世尊與諸比丘，從座而起，趣鳩娑村。

到彼村已，與比丘眾，前後圍繞，坐一樹下。

時，彼村中，諸婆羅門、長者居士，聞佛至已，皆悉馳競，來詣佛所，頭面

禮足，却坐一面。而白佛言：世尊！今者，與諸比丘，故來此村，別有餘趣？

於是，如來即答之言：我却後三月，當般涅槃。從毘耶離城，遍歷村邑，次第到此。

爾時，諸人聞佛此語，悲泣懊惱，悶絕躃地，舉手拍頭，搥胸大叫。

唱如是言：嗚呼！苦哉！世間眼滅，我等不久，失所歸導。

垂涕白言：惟願，世尊！住壽一劫若減一劫。

爾時，世尊而答之言：汝等不應生此悲惱。所以者何？有為之法，性相如是。汝等可捨憂惱之情，靜心聽我最後所說。

於是，諸人強自抑忍，低頭默聽。

時，彼座中，有一婆羅門，名弗波育帝，聰明智慧、博聞強記。

爾時，如來即告之言：汝等！當知在家之人，有四種法，宜應修習：①恭敬父母，盡心孝養；②恒以善法，訓導妻子；③愍念僮僕，知其有無；④近善知

識，遠離惡人。

汝等！若恒行此四法。現世，為人之所愛敬。將來所生，常在善處。

復次，弗波育帝！在家之人，有四樂法：

①不負他財，無慚愧色。

②極大巨富，自惜不用。父母、妻子、親戚、眷屬，皆不給與。又不供養沙門婆羅門。

③極大巨富，身著麗服，口恣上味。供養父母，親戚眷屬，皆悉給與。奉事沙門及婆羅門。

④身、口、意業，並不為惡。聰明智慧，樂欲多聞。

汝等！當知在家之人，雖復有此四種之樂，而不負他債及以慳貪，此法名為最下之樂。好行布施，名為中樂。身口意業不造於惡，聰明智慧，樂於多聞，此法名為上勝之樂。

爾時，如來而說偈言：

不負債及慳 斯名為下樂 有財行布施 此名為中樂

身口意業淨 智慧樂多聞 此則為上樂 慧者之所行

汝等從今日 乃至盡形壽 長幼互相教 行此中上法

爾時，弗波育帝等，而白佛言：世尊！我等從今，以中上法，互相開導。

於是，弗波育帝等五百人，即於佛前，受三歸依，并及五戒。

弗波育帝等，重白佛言：惟願，世尊及比丘僧！明受我供。

于時，如來默然許之。

弗波育帝等，知佛許已。即從座起，與其來眾，禮佛而退。還到其舍，通夕辦好香美飲食。既至明日，食時將到，遣信白言：惟願，世尊！自知其時。

於是，如來與比丘僧，前後圍繞，往詣其舍，次第而坐。

弗波育帝見佛及僧悉安坐已，便起行水，手自斟酌諸美飲食。餘婆羅門長者

居士有五百人，各齎美饌，亦在其舍，共供養佛。

時，諸比丘當於食上，有不善攝身威儀者。諸婆羅門長者居士既見之已，心不歡喜。

爾時，世尊知眾人心，而普告言：汝等！當知：如來正法，深曠如海，不可測量。又復大海，有諸眾生，身體極大，長萬六千踰闍那、或復身長八千踰闍那、或復身長四千踰闍那、或復身長千踰闍那、或復身長一寸，半寸，乃至極微。如來法海，亦復如是。其中，或有得阿羅漢，具足三明，及以六通，有大威德福天人者。其中，亦有得阿那含者、斯陀含者、須陀洹者。亦復有得四果向者，乃至亦有凡夫之人未得法利者。是故，汝勿於法海中，而生礙心。

於是，世尊而說偈言：

一切眾川流 皆悉歸大海 若飯佛及僧 福歸已亦然

爾時，如來說此偈已，又為眾人說種種法。

于時，弗波育帝等五百人，於諸法中，遠塵離垢，得法眼淨。

爾時，世尊與比丘僧，從座而起，更復前行，趣波波城。

弗波育帝等五百人，悲號啼泣，奉送如來，徘徊顧慕，絕望乃返。

爾時，世尊既至彼城。彼城之中，有工巧子，名曰淳陀，其人有園，極為閑靜。如來即便與諸比丘，前後圍繞，往住彼園。

是時，淳陀聞佛及僧，來其園中，歡喜踊躍，不能自勝。與其同類，俱詣佛所。頭面禮足，却住一面。而白佛言：不審世尊何緣來此？有他趣耶？

爾時，世尊即答之言：我今所以來至此者，不久應當入般涅槃。是以故來，最後相見。

是時，淳陀及其同類，聞佛此語。心大悲惱，悶絕於地。良久微聲，而白佛言：世尊今者，捨諸眾生，不慈念耶！云何便欲入般涅槃？惟願，世尊！住壽一劫若減一劫！

即又拍頭搥胸大叫，作如是言：嗚呼！苦哉！世間眼滅！一切眾生，從今以後，沒生死海，未有出期。所以者何？無上導師般涅槃故。

爾時，世尊告淳陀言：汝今不應生苦惱也。一切諸行，法皆如是，悉為無常之所遷變，合會恩愛，必有別離。是故，汝今勿生憂惱。

爾時，淳陀即白佛言：我今亦知諸行無常。合會恩愛，皆悉別離。然，無上尊當般涅槃，我今云何而不悲惱！

爾時，世尊即為淳陀，說種種法。

淳陀聞已，憂悲小歇，便從座起，整身威儀，偏袒右肩，頂禮佛足。白言：世尊！惟願明日受我薄供。

世尊即便默然許之。

爾時，淳陀知佛許已，禮足而退。淳陀還舍，通夕辦於多美飲食。

至明食時，遣信白佛：惟願，世尊！自知其時。

於是，如來與諸比丘，前後圍繞，往詣其舍，次第就坐。

是時，淳陀見佛坐已，即便行水，手自斟酌，下諸精饌。世尊及僧，食竟洗鉢，還歸本坐。淳陀亦坐。

爾時，世尊告淳陀言：汝今已作希有之福，最後供飯佛比丘僧。如此果報，無有窮盡。一切眾生，所種諸福，無有能得等於汝者。宜應自生欣慶之心，我今最後受汝請訖，更不復受他餘供飯。

爾時，世尊即說偈言：

汝今已建立 希有之功德 最後得供飯 佛及比丘僧
功德日增長 永無窮竭時 汝今宜自應 深生欣慶心
一切所造福 無有等汝者

爾時，世尊說此偈已，即語阿難：我今身痛，欲疾往彼鳩尸那城。

爾時，阿難與諸比丘，并及淳陀，聞佛此語，生大苦痛，號泣流漣，不能自

勝。

於是，世尊即從座起，與諸比丘，前後圍繞，趣向彼城。

爾時，淳陀亦與眷屬，隨從如來。世尊中路，止一樹下，語阿難言：我於今者，極患腹痛。

即將阿難，去樹不遠，而便下血。既還樹下，而敕阿難：汝可取我僧伽梨衣，四疊敷地。我欲坐息，不堪復前。

阿難受敕，世尊即便坐息樹下。又告阿難：我今患渴，汝可往至迦屈蹉河，取淨水來。

阿難答言：向有商人，五百乘車，從河而過。其水必濁，恐不堪飲。

如是再三，敕於阿難。阿難然後持鉢而去。

既到河上，見水澄清。心大怖懼，身毛皆豎，而自念言：我於向者，見諸商人，五百乘車，經此水過。意謂猶濁，不言便清。致令屢逆如來之敕。

即持水歸，而以供奉。作如是言：甚奇！世尊！向見商人，五百乘車，從河而度，妨於前後，十日之中，猶未應清。世尊神力，俄爾之頃，而便澄潔。

世尊即便受水飲之。

爾時，有一滿羅仙人之子，名弗迦娑，是彼迦蘭仙人弟子，從鳩尸那詣波波城。忽於中路，而見如來坐息樹下，合掌問訊，却坐一面。而白佛言：夫出家法，坐禪之業，最為第一。調伏情根，使心不亂，專精寂靜，莫能驚恐。所以者何？憶念往昔，隨從我師迦蘭仙人，行於道路，既患疲乏，近於路側，止息樹下。我師即便坐禪思惟。當爾之時，有諸商人，乘五十乘車，從前而過。我師爾時，猶故寂默，身不動搖。如是良久，方從禪起。我即便往，而白師言：「尊向在此，坐禪之時，有諸商人，五十乘車，經前而過，聲如雷震。不審尊向為見之不？」師答我言：「都無所見。」又復問言：「聞其聲不？」亦答：「不聞。」即復白言：「尊今衣上，所以有此塵土汙者，是彼車過，故致爾

耳。」我於爾時，深生奇特，知坐禪法，極可敬重。善攝情根，無能亂者。

爾時，世尊答弗迦娑：汝向所說，非為奇特。所以者何？若復有人，非是熟眠，亦復不入於滅盡定，端心坐禪。五百乘車，從其前過。此人于時，不覺不聞。如是，乃可名為奇特。復次，弗迦娑！斯亦未足為大奇特。若復有人，正念坐禪，遇天霹靂雷電震曜。時，有耕者兄弟二人，聞此驚怖，應聲而死。又有四牛，亦皆頓絕。而坐禪者，不覺不聞。斯可得名為奇特不？

弗迦娑言：五百乘車從前而過，不覺不聞，已為奇特。況復霹靂震曜動地，而不聞覺，極為希有！

爾時，世尊告弗迦娑：我於往昔，在阿車摩村，於一樹下，端坐思惟。時，有商人，五百乘車，經我前過。而我禪思，不覺不聞。諸商人等，經過良久，我方出定。時，彼商人遙見我起，皆悉競來，見我身上塵坌污衣，即便拂之。而問我言：「我等，向者五百乘車，從此而過，世尊見不？」即便答言：「我

不見也。」彼復問言：「世尊自可閉目不視，為聞聲不？」我又答言：「亦不聞聲。」商人又問：「世尊為眠？為是入於滅盡定耶？」我又答言：「我向不眠，亦非入定。但在禪思，故無聞見。」彼諸商人聞我此言，極生奇特，歎未曾有。而作是言：「坐禪之力，乃能如此。」我即為其說種種法。時，彼商眾悉於諸法，遠塵離垢，得法眼淨。

復次，弗迦娑！我於往日，在彼村側田間獨坐，寂默禪思。不久，忽然天大霹靂，雷電風雨震動天地。時，有耕者兄弟二人，忽聞此聲，同共怖死。又有四牛，亦復頓絕。時，彼村人聞有耕者二人怖死，或是父母、妻子、知識，合村相隨，涕泣來看。我於爾時，方從禪覺，見地泥水，又有眾人，集聚號哭。有一人來，我即問言：「何故人眾聚此悲泣？」彼人答言：「世尊！向者，不覺雷電霹靂聲耶？我村之中，兄弟二人在此而耕。同時，為於霹靂所殺。及以四牛，亦皆俱死。云何世尊而不覺知？如來向者，為是得眠？為是入於滅盡定

耶？」即答之言：「我向不眠，亦不入定。端寂坐禪，故不聞耳。」是時，彼人聞佛此語，深生奇特，歎未曾有。心自念言：「坐禪乃有如此之力。」我即為其種種說法。既聞法已，於諸法中，遠塵離垢，得法眼淨。

時，弗迦娑聞佛此言，生希有心。而白佛言：本見我師坐禪之時，五十車過而不聞知，謂為奇特。今者，如來說此二事，百千萬倍，不可為比。如來禪力不可思議。

即便從佛受三歸依，如來為說種種妙法。

其聞法已，心開意悟，遠塵離垢，得法眼淨。即語侍人：汝可取我金色劫貝二張持來，我欲上佛。

侍人奉敕，即取將來。時，弗迦娑手執劫貝，長跪佛前，而作是言：我今以此奉上世尊，惟願哀愍，即賜納受。

爾時，世尊答弗迦娑：我今為汝受取一張，可以一張施於阿難。所以者何？

阿難日夜，親侍我側。且又今日，看我疾病。若有施主，施於病人及看病者，斯則名為滿足大施。

時，弗迦娑聞佛此語，歡喜踊躍。即以一張置佛足下。又持一張至阿難所，長跪白言：我今以此奉施尊者，惟願納受。

阿難答言：善哉！善哉！汝今能信天人師言。令汝長夜，永得安樂，我為汝受。

於是，弗迦娑還至佛所，如來即復為說諸法。其聞法已，得阿那含果。

時，弗迦娑復白佛言：我今欲於佛法出家。

佛即喚言：善來比丘！

鬚髮自落，袈裟著身，即成沙門，得阿羅漢。

爾時，如來從其面門，放種種光，青黃赤白、頗梨紅色。

於是，阿難頂禮佛足，長跪叉手，而白佛言：不審，世尊！有何因緣，而現

此瑞？

佛即答言：阿難！當知我有二時放大光明：

①在菩提樹，欲成佛時，放大光明；②欲般涅槃，放大光明。

阿難！知不，我成阿耨多羅三藐三菩提，盡於夜分。般涅槃時，亦復如是。汝今，當知我於今者，後夜分盡，在鳩尸那城力士生地熙連河側娑羅雙樹間，入般涅槃。

說此語已，諸比丘眾、虛空諸天，悲號啼泣，不能自勝。

爾時，世尊與比丘眾，到迦屈蹉河，世尊即便入河洗浴。洗浴訖已，共比丘僧，坐於河側。

爾時，淳陀心自咎責：世尊因受我之供飯，而患腹痛，欲般涅槃。

爾時，世尊知淳陀心，告阿難言：汝今當知，一切眾生，勿自責言：「如來因受我之供飯，致使身患而般涅槃。」所以者何？如來出世，有二種人，獲福

最上。①欲成阿耨多羅三藐三菩提時，而來奉施；②如來臨欲般涅槃時，最後供飯。此二人福，正等無異，所獲果報，不可稱計。如此二施，難可值遇，如優曇鉢花，時時乃有。

爾時，世尊即告淳陀：汝今心意正有此念，不應自生如此悔責。已獲無上難得之寶，宜應自生慶幸之情。百千萬劫，佛名難聞；雖得聞名，見佛又難；雖得見佛，供養又難；雖得供養，在此二施，亦又甚難。汝今已果，不久當獲辯才、智慧、色、力、壽命。

爾時，淳陀聞佛此語，心生歡喜，不能自勝。而白佛言：快哉！世尊！我今已得如此大利。

爾時，世尊而說偈言：

布施者獲福 慈心者無怨 為善者消惡 離欲者無惱
若行如此行 不久般涅槃

爾時，世尊說此偈已，告淳陀言：汝今應以最後施福，廣為人說。令得聞者長夜獲安。

爾時，世尊告阿難言：我今欲進鳩尸那城力士生地熙連河側娑羅雙樹間。

阿難白言：唯然！世尊！

於是，如來與諸比丘，前後圍繞，而便進路，渡熙連河，住鳩尸那城力士生地娑羅林外。

語阿難言：汝可往至娑羅林中見有雙樹孤在一處，灑掃其下，使令清淨。安處繩床，令頭北首，我今身體極苦疲極。

爾時，阿難及諸比丘，聞佛此語，倍增悲絕。阿難流淚，奉敕而去，至彼樹下，灑掃敷施，皆悉如法。還歸白言：灑掃敷施，皆悉已畢。

爾時，世尊與諸比丘，入娑羅林，至雙樹下，右脇著床，累足而臥，如師子眠，端心正念。

爾時，雙樹忽然生花，墮如來上，世尊即便問阿難言：汝見彼樹非時生花供養我不？

阿難答言：唯然，見之。

爾時，諸天龍神八部於虛空中，雨眾妙花、曼陀羅花、摩訶曼陀羅花、曼殊沙花、摩訶曼殊沙花，而散佛上。又散牛頭栴檀等香，作天伎樂、歌唄讚歎。

佛告阿難：汝見虛空諸天八部供養我不？

阿難白言：唯然，已見。

世尊又復告阿難言：欲供養我，報於恩者，不必以此香花伎樂。淨持禁戒、讀誦經典、思惟諸法深妙之義，斯則名為供養我也。

爾時，有一比丘，名優波摩那，如來昔日未取阿難為侍者時，其恒執事看視如來。時，優波摩那既見如來臥雙樹下，心大苦惱，在佛前泣。

爾時，世尊而告之言：汝今不須當我前倚。

優波摩那即却一面。

爾時，阿難心生疑念：我侍佛來，經歷年載，未曾見佛作如此語。今日何故不聽前立？如來，今者不久，便當入般涅槃，而復不聽在前悲泣？

於是，阿難即禮佛足，長跪叉手。白言：世尊！我從昔來，侍佛至今，數數在於世尊前立，而未曾聞令我却退。今者，何故語優波摩那使避前耶？

佛言：阿難！諸天龍神八部之眾，聞我在於娑羅雙樹右脅而臥，皆悉競來瞻視於我。從虛空中，累至于地，四面充滿，各三十二踰闍那。此優波摩那比丘當我前立，天龍八部生不喜心。作如是念：「如來今者，在雙樹間，不久便當入般涅槃，我等最後瞻視之時，而此比丘當佛前立。」以是因緣，故令之却。

阿難！知不，今此八部，或有悲泣不能自勝、或有懊惱迷悶欲絕、或有以手自拔頭髮、或有牽絕嚴身具者？悉皆同聲唱如是言：「如來，今者入般涅槃，何其速哉！如來出世，難可值遇。如優曇鉢花，時時乃現。而今不久，入般涅槃。」

槃。嗚呼！苦哉！世間眼滅，我等從今，誰為歸導？」離欲諸天，皆悉歎言：「嗚呼！世間極為無常！無有受生，不歸滅者。」又，彼諸天共相謂言：「世尊昔日，或在毘耶離城、或在王舍城、或在舍衛國并及餘處，安居訖已，諸比丘眾從四方來，問訊世尊。我等因此，得於路側見諸比丘，禮拜供養，聽受經法，長獲福利。世尊今者，既般涅槃，諸比丘僧安居竟已，無復問訊，遊行處所。我等不復得於路側，見諸比丘，禮拜供養，聽受經法。從今永失如此福利。」

爾時，如來告阿難言：若比丘、比丘尼、優婆塞、優婆夷，於我滅後，能故發心，往我四處。所獲功德，不可稱計。所生之處，常在人天，受樂果報，無有窮盡。何等為四？

- ①如來為菩薩時，在迦比羅旃兜國藍毘尼園，所生之處；
- ②於摩竭提國，我初坐於菩提樹下，得成阿耨多羅三藐三菩提處；

③波羅柢國鹿野苑中仙人所住，轉法輪處；

④鳩尸那國力士生地熙連河側娑羅林中雙樹之間，般涅槃處。

是為四處。若比丘、比丘尼、優婆塞、優婆夷，并及餘人、外道徒眾，發心欲往到彼禮拜，所獲功德，悉如上說。

爾時，阿難聞佛此語。白言：世尊！我從今者，當普宣告諸四部眾，知此四處，若往禮拜，功德如是。

爾時，阿難復白佛言：若有善心諸優婆夷善持戒行，樂聽經法，欲見比丘。我等從今，當云何耶？

佛言：汝等從今，勿與相見。

阿難言：若脫遇會，與之相逢。當復云何？

佛言：勿與共語。

阿難言：若不共語，其脫諮請，欲聞經法。當復云何？

佛言：應為說法，但當善攝汝身口意。

爾時，阿難而白佛言：我等從今，如是奉行。

爾時，阿難而白佛言：世尊入於般涅槃後，供養之法。當云何耶？

佛言：汝今不應逆憂此事。但自思惟：「於我滅後，護持正法，以昔所聞，樂為人說。所以者何？諸天自當供養我身。又，婆羅門及以諸王、長者居士，此等自當供養我身。」

阿難言：雖復天人自興供養。然，我不知應依何法？

佛言：阿難！供養我身，依轉輪聖王。

阿難又問：供養轉輪聖王，其法云何？

佛言：阿難！供養轉輪聖王之法，用新淨綿，及以細氎，合纏其身。如是，乃至積滿千重，內金棺中。又作銀棺，盛於金棺。又作銅棺，盛於銀棺。又作鐵棺，盛於銅棺，然後灌以眾妙香油。又復棺內，以諸香花而用塗散。作眾伎

樂，歌唄讚頌，然後下蓋。造大寶輿，極令高廣，軒蓋欄楯，眾妙莊嚴，以棺置上。又，於城中作閣維處。掃灑四面，極令清淨，以好栴檀及諸名香，聚為大積。又於積上，敷舒繒氎，施大寶帳，以覆其上。然後昇舉，至閣維處，燒香散花，伎樂供養，繞彼香積，周迴七匝，然後以棺置香積上，而用香油以澆灑之。燃火之法，從下而起。閣維既竟，收取舍利，內金瓶中，即於彼處，而起兜婆，表刹莊嚴，懸繒幡蓋。諸人民等，恒應日日燒香散花，種種供養。阿難！當知供養轉輪聖王之法，其事如是。

閣維我身，亦與王等。然，起兜婆，有異於王。表刹莊嚴，應懸九繖。若有眾生，懸繒幡蓋，燒香散花，及燃燈燭，禮拜讚歎我兜婆者，此人長夜獲大福利。將來不久，他人亦復起大兜婆，供養其身。

阿難！當知一切眾生皆無兜婆，唯有四人得立兜婆：

①如來．應．正遍知．明行足．善逝．世間解．無上士．調御丈夫．天人

師。佛世尊，慈愍眾生，堪為世間作上福田，應起兜婆；

②辟支佛，思惟諸法，自覺悟道，亦能福利世間人民，應起兜婆；

③阿羅漢，隨所聞法，思惟漏盡，亦能福利世間人民，應起兜婆；

④轉輪聖王，宿殖深福，有大威德，王四天下，七寶具足，自行十善，又復勸於四天下人亦行十善，應起兜婆。

阿難！當知若有眾生以諸供具，而以供養此兜婆者，其所得福，漸次差降。

爾時，阿難聞佛此語，心生懊惱，悲號啼泣。隱於佛後，相去不遠，而以微聲，作如是言：我今猶是學地之人，於諸法中未得深味，而天人師一旦捨我入般涅槃，我當何時踐解脫路？即便舉手攀一樹枝，搥胸拍頭，悶絕懊惱。

爾時，世尊問餘比丘：阿難即時為在何處？

比丘答言：阿難今者在如來後，於一樹下，啼泣懊惱。

又告比丘：汝可往彼語阿難言：天人之師今欲見汝。

比丘便往，說如來旨。阿難既聞，即便來還，至於佛所，頭面禮足，倚立一面。

世尊於是問阿難言：我於近日，已為汝說：「一切諸行，皆悉無常。合會恩愛，必歸別離。」汝今何故，猶生悲惱？

復次，阿難！汝從往昔，侍我至今，左右執事進止去來，及通賓客，皆得宜節。又，復見汝身口及意，皆悉清淨，無有瑕穢。汝獲福利，不可稱計。

爾時，世尊告諸比丘：阿難不應作此悲惱。所以者何？不久當得到解脫處。

比丘！當知過去諸佛，皆有侍者，如今阿難。未來諸佛，亦復如是。

比丘！當知今此阿難，智慧深妙、聰明利根。我從昔來，所說法藏，阿難皆悉憶持不忘。

復次，比丘！阿難善知進止時節，若有人客欲來見我，阿難即先思量其時：世尊或應某時見諸比丘、或應某時見比丘尼、或應某時見優婆塞、或應某時見

優婆夷、或應某時見婆羅門、或應某時見於刹利、或應某時見長者居士、或應某時見諸外道。如是等眾，若來見我，及聞說法，皆悉多獲功德福利。所以者何？悉是阿難通進見我，得其善根成熟時故。

復次，比丘！轉輪聖王，有四奇特希有之法。

①若婆羅門，來至轉輪聖王之所。既到，見王顏容端正，威德高顯，心生歡喜。次聞王語，音辭清徹，亦生歡喜。乃至見王默然無言，又懷踊躍。及與王辭，還歸所止，迴戀顧慕，步步悵怏，如飢渴人不得飽滿。②諸小刹利；③毘舍；④首陀羅，亦復如是。此為轉輪聖王四奇特事。

當知阿難亦有此四奇特之事。①若諸比丘從遠方來，欲問訊我，次見阿難，皆生歡喜。聞其說法及見默然，亦復欣悅。辭別而退，戀德情深，不能有已。②比丘尼；③優婆塞；④優婆夷，亦復如是。汝等當知，阿難有此四奇特事。

爾時，世尊告阿難言：汝今不應自生苦惱而作是言：「天人之師將般涅槃，

我今無復解脫之期。」所以者何？凡我所說一切法藏，於我滅後，思惟奉持，勤行精進，不久自當得於解脫。

爾時，阿難既得如來梵音安慰，憂惱小除。而白佛言：我今心意如小醒悟，欲有所請，惟願哀愍。

佛即答言：欲請何事？

阿難言：此鳩尸那城，比餘大國，極為邊狹，人民又復不能熾盛。惟願，世尊！往餘大國，王舍城、毘耶離城、舍衛國城、婆羅捺城、阿踰闍城、瞻波城、俱睺彌城、德叉尸羅城。如是諸城所處正中，人民熾盛，國土豐樂，皆多信心，智慧聰明。惟願，世尊！往彼諸城而般涅槃，廣利其中諸眾生等。

爾時，世尊答阿難言：汝今不應作是請我，言「此鳩尸那城，為邊狹也」。汝當諦聽，今為汝說。

阿難！過去久遠，此鳩尸那城，有轉輪聖王，名大善見。七寶具足，王有千

子，能伏怨敵，皆以正法化諸人民。爾時，此城名鳩尸婆帝城，東西二門，其間相去十二踰闍那，南北二門，其間相去八踰闍那。其城四面周匝七重。其內一重，淳以黃金。其第二重，淳以白銀。其第三重，淳以琉璃。其第四重，淳以頗梨。其第五重，淳以砮磲。其第六重，淳以馬瑙。其第七重，雜以眾寶。其城樓櫓皆悉七層，牕牖欄楯七寶雕飾，懸眾寶鈴，寶網羅上。其間相去，盡一箭道。其城四門，門各九重，莊校嚴飾，光麗悅目。七重城外，各有塹水，其水澄潔，具八功德，皆以七寶而為階陛。諸雜類鳥，鸞鳳、孔雀、鳬雁、鴛鴦，翻翔飛舞，鳴集其中。其水，復有鳩牟頭花、鬱波羅花、分陀利花，青、黃、赤、白、雜色蓮花。又，其岸上有七行寶樹，行各異寶，微風徐起，吹彼樹枝，條葉相觸，音如天樂。城中人民皆悉盈滿，安隱豐樂極為熾盛，諸五欲具如忉利天。道路之中懸諸明珠，人民行止，初無晝夜。此城恒有十種音聲：①象聲、②馬聲、③車聲、④鼓聲、⑤螺聲、⑥琴瑟等聲、⑦歌聲、⑧扣鍾擊

磬設大會聲、⑨讚嘆持戒人聲、⑩互共說法語論之聲。

大善見王，有諸威德，端正第一。眾人見者，無不愛敬。長壽、歡樂，身無小疾。王性慈仁，愍念一切，猶如慈父憐愛其子。一切人民，親敬於王，亦復如父。

阿難！大善見王，別於一時欲出園林，遊觀嬉戲，嚴四種兵，各八萬四千。又復後宮夫人嫖女，亦嚴八萬四千乘車，欲隨遊看。時，王又復敕於國中諸婆羅門長者居士，令隨出遊。嚴駕辦已，時，主兵臣入白王言：「四兵已辦，願王知時。」時，王即便昇白象輿，與婆羅門長者居士大臣眷屬及以四兵，前後圍繞，出往園中，象行駿疾，猶如風馳。爾時，諸臣及婆羅門、長者居士，共諫王言：「大王久在深宮之中，外諸人民無緣見王。今者既往園林遊觀，諸人民眾充塞路側，皆悉瞻仰欲見大王。以是事故，願敕御者，不須迅速。」王聞此語，即敕御者：「令徐徐行。」路邊人民，恣意瞻仰，如子見父。爾時，彼

王見諸衢巷，無不平坦。又七寶樹，羅列蔭映，而無池水。即敕一臣：「夾諸路側，造七寶池，其間相去皆一百弓。」又令栽植種種名花，又復敕令：「一一池間給諸侍人，有來浴者，供以香花。又與飲食，恣意取足。如是供給，不捨晝夜。」又敕彼臣：「自今已後，四遠人民，有來求乞，隨須給與。」既到園林，與婆羅門長者居士并餘大臣，遊觀嬉戲，乃至日暮，珠光明曜，如晝無異，不見日影乃知是夜。時，王與諸婆羅門眾長者居士并餘臣民，嬉戲訖已，還歸宮城。別於他日，時婆羅門長者居士及與大臣，持眾名寶，共來獻王。王即語言：「我於近日，園林遊戲。敕於某臣：『自今已去，有來求索，隨意給與。』我之布施，乃至如是。卿等云何，反以眾寶而來獻我？」時，王即便心自思惟：「此諸人等，所以持寶來獻我者，皆緣國中富貴之故。如此之事，由民貧來。」即敕藏臣，出諸珍寶及資生具，置四衢道，搥鍾擊鼓，唱令四遠：「大善見王，今開寶藏，以用布施。若有所須，隨意來取。」王恒如是廣行布

施，利益眾生不捨晝夜。爾時，國中諸婆羅門長者居士及以大臣，而白王言：「大王常可所居宮殿，極為褊狹。我等每來問訊王時，諸侍從者不相容受。惟願，大王！開拓令廣。」王聞此語，默然許之。心自念言：「我今宜應開闊住處。」時，天帝釋知王心念。呼一天子，名毗首建磨，極為妙巧，無事不能，而語之言：「今閻浮提轉輪聖王，名大善見，其今欲更開拓宮城。汝便可下，為作監匠。使其居處，嚴麗雕飾，如我無異。」彼天奉敕，即便來下，猶如壯士屈伸臂頃，到閻浮提，當王前立。時，王既見彼天子形，風姿端正，必知非凡，而問之言：「汝是何神，而忽來下？」天即答言：「大王！當知我天帝釋之大臣也，名毗首建磨，極閑工巧。大王心欲開廣宮殿故，天帝釋遣我來下，為作監匠以助於王。」王聞此言，心懷歡喜。時，彼天子即便經始開廓宮城，城之四門，其間相去二十四踰闍那，為王起殿。高下縱廣，各八踰闍那。七寶嚴麗如帝釋宮，其殿凡有八萬四千間隔住處，皆有七寶床帳臥具。又復為王起

說法殿，高下縱廣，亦八踰闍那，七寶莊嚴無異於前。其殿四面，有七寶樹，及以名花列植蔭映。又造寶池，其水清潔，具八功德。其殿中央，施師子座，七寶莊嚴，極為高廣，覆以寶帳，垂七寶眊。又為四遠來聽法者，設四寶座，黃金、白銀、琉璃、頗梨，其數凡有八萬四千。毗首建磨既為彼王造作宮城，皆悉竟已，與王辭別，忽然不現，還歸天上。

時，大善見王既見宮城，皆悉修立。即敕擊鼓，唱令國界：大善見王，却後七日，當為一切，說種種法。若欲樂聞，皆可來集說法殿上。

時，婆羅門、長者、居士、大臣、人民，聞此唱令，至於其日，皆悉來集。

時，王即便上說法殿，登師子座。一切來眾，亦皆坐於四寶之座。

爾時，彼王先為諸人說十善法，然後又為開餘法門，乃至經於萬二千歲。其國眾生，若有曾聞彼王法者，命終生天，不墮三塗。

阿難！彼王恒作如此利益一切眾生。

阿難！時，大善見王於靜室中，心自念言：「我過去世，有何行業、修何善根，生世尊貴，有大威德，色力壽命，人無等者？正當由於過去世中，廣修布施、忍辱、慈悲故，今獲得如此報耳。我今宜應更修進勝。」而便思惟。不久之間，即得初禪，乃至得於第四禪，復更修習四無量心。阿難！大善見王又教夫人及以嫖女，令修四禪。

爾時，雪山有八萬四千白象，日日來到，列王殿前。時，王心念：「此諸白象，恒來我所，經由道路，踐踏眾生。」即便敕語主兵臣言：「自今已後，不須此象日來我所，經一千歲，可令一來，但令四萬二千便足，不必其滿八萬四千。」

王玉女寶，名曰善賢，與餘夫人及以嫖女八萬四千人，於靜室中坐禪思惟，經四萬歲。共相謂言：「我等在此坐禪思惟，經四萬歲，不見大王。今者宜應禮拜問訊。」作此言已，即便相隨到於王所。其餘宮人，入白王言：「善賢今

與八萬四千女人，來問訊王。」時王聞已，即便往於說法殿上，昇師子座。俄爾之頃，善賢等至，王即喚前。時，善賢等相隨而進，到於王所，頭面禮足，次第而坐。即作是言：「我等共在靜室之中坐禪思惟，經四萬歲，不見王久，故來問訊。欲有所說，惟願聽許。」王即答言：「善哉！隨意。」善賢即便而白王言：「此閻浮提，西瞿耶尼，北鬱單越，東弗婆提，四方人民極為熾盛，富樂安隱，皆行十善，並是大王德化力也。此閻浮提，如鳩尸婆帝城者，其數凡有八萬四千，此諸城等，國王臣民及婆羅門，皆悉來此，欲見大王。而王坐禪經多年歲，來朝謁者皆不相見，譬如孝子不見慈父。又，四天下，不見大王遊歷甚久。惟願，大王！善將時宜，撫接民人。我等女弱，於國無益，所以坐禪適意久遠。大王處貴，統攝內外，一切人民莫不宗仰，豈得如我女人所行。白象車馬，其數各有八萬四千，大王宜應乘之遊觀。大王昔日，恒為一切說種種法，授以十善，頃來坐禪，斯事頓廢。」于時，善賢以如此事，種種諫王。

大善見王聞此語已，而答之言：「汝於前後，每以善事而諫勸我，今聞汝言，殊乖昔意。」爾時，善賢聞王此誨，心生懊惱。垂涕念言：「我向所以諫大王者，正以所見，謂為得中，不圖乃復，更生罪咎。」即從座起，頂禮王足，而白王言：「今我愚癡，不識正理。乃以此事，而用上諫。惟願，大王！聽我懺悔。」爾時，大善見王答善賢言：「一切諸行，皆悉無常。恩愛合會，亦復別離。此四天下，雖爾熾盛，我亦不久，當捨棄之。我於往昔八萬四千歲而為嬰兒，八萬四千歲而為童子，八萬四千歲為灌頂太子，八萬四千歲為灌頂王。然後得成轉輪聖王，領四天下，七寶具足。八萬四千歲統理民務，八萬四千歲為諸人民講說諸法，八萬四千歲坐禪思惟。從爾已來，五十八萬八千歲，雖復如此，壽命延長，會歸於盡。我今已老，死時將至。古昔諸王尊貴快樂，如我不異，亦復遷謝，歸於無常。鳩尸婆帝城及餘八萬四千大城會亦磨滅，不應於此獨生愛著，長放逸心。我今所以獲此尊勝，皆由往昔積諸善業。今者宜應廣植

諸善，造來生因。是故坐禪經積年歲。」爾時，善賢等聞王此言，心大歡喜，頂禮王足，退還所住。

如是，不久，王得篤疾，自知命盡。即立太子，而以為王。集餘大臣及婆羅門長者居士，以四海水灌太子頂。事既畢竟，王即命終，上生梵天。

阿難！大善見王王四天下，而其所居，唯閻浮提。大城雖有八萬四千，而其所處，唯鳩尸婆帝。雪山之中有八萬四千白象之寶，而王所乘，不過一象。雖有八萬四千駿馬，而王所騎，不過一匹。雖有八萬四千七寶之車，而王常駕，不過一乘。雖有八萬四千夫人，王之所愛，唯在一人。雕飾寶殿，八萬四千，王之所處，不過一室。身之所須，飽足而已，而王役慮四方，纏心物務，徒勞精神，於身無益。

阿難！大善見王，豈異人乎？我身是也。我於往昔獲此尊貴，所居國城，即在於此。我於此城作轉輪王，不可稱數，成就利益無量眾生。今者，諸天充滿

虛空，皆是我昔為王之時，以諸善法教化所成。其於今日，復在此城，見般涅槃，當令其獲般涅槃果。阿難！以是事故，汝云何言：「此鳩尸那城為邊狹」耶？我今決定住於此城而般涅槃。

當於如來說此事時，諸天及人億那由他，於諸法中，遠塵離垢，得法眼淨。即共同聲，而白佛言：世尊！往昔無量無邊阿僧祇劫，以諸善法利益我等。今又於此以般涅槃樂安立於我。即散名花，并作天樂，歌唄讚歎，供養如來。

爾時，阿難而白佛言：奇哉！世尊！此鳩尸那城，過去乃有斯奇特事。我今不復生小心也。

爾時，世尊告阿難言：汝今可入鳩尸那城，語諸力士，道：「我今日於後夜分入般涅槃。」皆悉令來，與我相見。若有所疑，恣意請問。莫令於我般涅槃時，不及相見，後生悔恨。

爾時，阿難聞佛言已，垂泣懊惱，頂禮佛足，攝身威儀。與一比丘，俱共入

城。

時，鳩尸那城諸力士等，男女大小，始共集聚，論敘如來當般涅槃，各各皆欲往詣佛所。會見阿難，即便問言：我聞「世尊在雙樹間將般涅槃」，正共言論，欲至佛所。

於是，阿難具以如來所敕之辭告諸力士。力士聞已，悲號懊惱，悶絕躃地，互共微聲，而相謂言：嗚呼！苦哉！世間眼滅，我等從今，何所歸依？猶如嬰兒，失於慈母。從今已去，人天轉滅。三惡道趣，日就增盛。

白阿難言：我等眷屬，今欲相隨往至佛所。

是時，阿難還白佛言：以世尊語，入城宣示。諸力士眾，莫不驚絕，涕泣歔歔，皆悉當來瞻奉世尊。諸力士等，男女大小，一切相隨，流淚嗚咽，緣路而進。

是時，阿難見諸力士人數甚多。心自念言：若此人眾一一禮佛，無有竟時。

我今當令家家一時禮。

諸力士眾，至佛所已。阿難即便普語之言：汝等來眾，既為不少。若人人禮佛，不卒得竟。今可家家一時禮也。

力士奉旨，即便禮佛，退住一面。而白佛言：惟願，世尊！住壽一劫若減一劫，不般涅槃，利益一切諸天人民。今諸眾生，無有慧眼。惟願，世尊！為作開導。

爾時，如來告力士言：汝今不應作此請我。

所以者何？一切諸行，皆悉無常。恩愛合會，必歸別離。設我住世，若滿一劫，會亦當滅。我所說法，但當憶持，誦念勿忘。此則不異我在世也。

諸力士等聞佛此言，不果所請，心懷愁悴，悲泣懊惱，默然而住。

爾時，鳩尸那城，有一外道，年百二十，名須跋陀羅，聰明多智，誦四毘陀經，一切書論，無不通達，為一切人之所宗敬。其聞「如來在娑羅林雙樹之間

將般涅槃」，心自思惟：我諸書論說：「佛出世，極為難遇。如優曇鉢花，時一現耳。」其今在於娑羅林中，我有所疑，試往請問。瞿曇若能決我疑者，便是實得一切種智。

作此念已，往到佛所，在於林外，逢見阿難。即語之言：我書論中說「佛興世，極難值遇。億千萬劫，時時乃出，如優曇鉢花，不可數覩。」在世教化，我初不見。今聞「在此娑羅林中，當般涅槃。」我有所疑，欲往請問。汝可為我白世尊言，道「我今者欲希相見」。

爾時，阿難聞其此語，心自思惟：世尊今者，四大不和，接對來久，已自增惡。若復與此外道相見，必有言論，容致損劇。

即答之言：世尊今者四大不和，寢臥林中，極苦身痛。汝今不須見如來也。莫臨世尊般涅槃時，而作障礙。

須跋陀羅如是三請，阿難亦復如是三答。

爾時，世尊以淨天耳，聞須跋陀羅請阿難聲。又觀其根，是可度時。即以梵音告阿難言：汝莫於我最後弟子獨作留礙。聽須跋陀羅前來，我欲見之。此人質直，聰慧易悟。所以求進，欲決疑難。非為故來論勝負也。

於是，阿難即承佛教，語須跋陀羅：世尊今已敕聽汝前。

須跋陀羅聞佛許前，歡喜踊躍，不能自勝。而心念言：沙門瞿曇決定是得一切種智。

即前佛所，互相問訊，坐於一面。而白佛言：瞿曇！欲有所問，惟願聽許。

佛言：善哉！善哉！須跋陀羅！恣汝所問。

須跋陀羅即問佛言：今者，世間沙門婆羅門外道六師：富蘭那迦葉、末伽利拘賒梨子、刪闍夜毘羅胝子、阿耆多翅舍欽婆羅、迦羅鳩駄迦旃延、尼犍陀若提子等，各各自說是一切智，以餘學者名為邪見。言其所行是解脫道，說他行者是生死因，互相是非。云何而得知其虛實？何師應得沙門之稱？何師定是解

脫之因？

爾時，如來即答之曰：善哉！善哉！須跋陀羅！乃能問我如此之義。諦聽！諦聽！吾為汝說。

須跋陀羅！諸法之中，若不見有八聖道法，當知無有一沙門名，二及三四亦復不有。既無沙門，亦無解脫。解脫既無，非一切種智。

須跋陀羅！若諸法中，有八聖道法，當知必有四沙門名。有沙門名，則有解脫。既有解脫，是一切種智。

須跋陀羅！唯我法中，有八聖道，有四沙門名，是解脫道，是一切種智。彼諸外道，富蘭那迦葉等，其說法中，無八聖道，無沙門名，非是解脫及一切種智。若言有者，當知必是虛誑之說。

須跋陀羅！一切眾生，聞我所說，信受思惟。當知其人，必不空聞，要得解脫。

須跋陀羅！我在王宮未出家時，一切世間皆為六師之所迷醉，初未見有沙門之實。

須跋陀羅！我年二十有九，出家學道。三十有六，於菩提樹下，思八聖道，究竟源底，成阿耨多羅三藐三菩提，得一切種智。即往波羅捺國鹿野苑中仙人住處，為阿若憍陳如等五人，轉四諦法輪，其得道跡。爾時，始有沙門之稱，出於世間福利眾生。

須跋陀羅！當知我法，能得解脫。如來實是一切種智。

爾時，須跋陀羅既聞如來說八聖道，心生歡喜，舉身毛豎。渴仰欲聞八聖道義。而白佛言：惟願，世尊！為我分別八聖道義。

於是，世尊即便為其分別廣說。

須跋陀羅既聞佛說八聖道義，心意開朗，豁然大悟。於諸法中，遠塵離垢，得法眼淨。即白佛言：我今欲於佛法出家。

於是，世尊即便喚之：善來比丘！

鬚髮自落，袈裟著身，即成沙門。

世尊又為廣說四諦，即獲漏盡，成阿羅漢。

爾時，世尊告阿難言：汝今當知，我於道場成阿耨多羅三藐三菩提。最初說法，度阿若憍陳如等五人。今日在於娑羅林中，臨般涅槃最後說法，度須跋陀羅。諸天及人，無復更應聞我說法而得度者。若有善根，應得解脫，當來皆是我之弟子，展轉相教。

阿難！須跋陀羅，雖是外道。而其善根，應成熟時，唯有如來能分別知。我般涅槃後，若有外道欲於我法求出家者，汝等不應便聽許之。先令四月誦習經典，觀其意性為虛為實。若見其行質直柔軟，於我法中實有深樂，然後方可聽其出家。阿難！所以然者，汝等小智，不能分別眾生之根。是故，令汝先觀之耳。

爾時，須跋陀羅而白佛言：我於向者，欲求出家。世尊若令先於佛法四十年中讚誦經典，然後聽我而出家者，我亦能爾，豈況四月！

爾時，世尊即告之言：如是。如是，須跋陀羅！我觀汝意，於我法中，慇懃渴仰。今作此言，非為虛設。

爾時，須跋陀羅前白佛言：我今不忍見天人尊入般涅槃。我於今日，欲先世尊入般涅槃。

佛言：善哉！

時，須跋陀羅，即於佛前，入火界三昧而般涅槃。

爾時，如來告阿難言：汝勿見我入般涅槃，便謂正法於此永絕。

何以故？我昔，為諸比丘制戒波羅提木叉，及餘所說種種妙法。此即便是汝等大師，如我在世，無有異也。

阿難！我般涅槃後，諸比丘等各依次第，大小相敬，不得呼姓，皆喚名字。

互相伺察，無令眾中有犯大戒。不應闕求，覓他細過。車匿比丘，應與重罰。

阿難問佛：與何重罰？

佛言：阿難！與重罰者。一切比丘，勿與共語。

於是，阿難如教奉行。

爾時，世尊告諸比丘：汝等今者，若有疑難，恣意請問，莫我滅後，生悔恨言：「如來近在娑羅林中，我於爾時不往諮決，致令今日情有所滯。」我今雖復身體有疾，猶堪為汝等解釋疑惑。若欲於我般涅槃後奉持正法利益天人，今宜速來決所疑也。

世尊乃至如是三告，諸比丘等默然，無有求決疑者。

爾時，阿難即白佛言：奇哉！世尊！如是三誨，而此眾中無有疑者。

佛言：如是。如是，阿難！今此眾中，五百比丘未得道者，我般涅槃後，未來世中，當得盡漏。汝亦當在此中數也。

爾時，世尊告諸比丘：汝等！若見我「身口意脫相犯觸」，汝當語我。

時，諸比丘聞佛此語，流淚懊惱。而白佛言：如來豈當有身口意微細過耶？

於是，如來即便說偈：

諸行無常 是生滅法 生滅滅已 寂滅為樂

爾時，如來說此偈已，告諸比丘：汝等當知：一切諸行，皆悉無常。我今雖是金剛之體，亦復不免無常所遷。生死之中，極為可畏，汝等宜應勤行精進，速求離此生死火坑。此則是我最後教也。我般涅槃，其時已至。

時，諸比丘及餘天人，聞佛此誨，悲號涕泣，悶絕躃地。

如來即便普告之言：汝等不應生此悲惱，諸行性相，皆悉如是。

於是，如來即入初禪。出於初禪，入第二禪。出於二禪，入第三禪。出於三禪，入第四禪。出第四禪，入於空處。出於空處，入於識處。出於識處，入無所有處。出無所有處，入於非想非非想處。出於非想非非想處，入滅盡定。

爾時，阿難既見如來湛然不言，身體肢節不復動搖。即便流淚，而作是言：世尊今已入般涅槃。

爾時，阿菟樓駄語阿難言：如來即時，未般涅槃。所以湛然，身不動者，正是入於滅盡定耳。

爾時，世尊出滅盡定，更還入於非想非非想處，乃至次第入於初禪。復出初禪，入第二禪。出於二禪，入第三禪。出於三禪，入第四禪，即於此地入般涅槃。

爾時，阿菟樓駄語阿難言：世尊已於第四禪地入般涅槃。

於是，阿難及四部眾，聞阿菟樓駄作此言已。悲號嗚咽，悶絕躃地。其中或有舉手拍頭，搥胸大叫，共相謂言：世間眼滅，一何速哉！一切眾生，從今已去，誰為導者？人天方滅，惡道日增。

時，虛空中天龍八部，涕泣滂沱，猶如驟雨。互相謂言：我等從今，誰為歸

依？猶若嬰兒，失於慈母。三惡道逕，日就開闊。解脫之門，方巨重關。一切眾生，沉淪苦海。亦如病人，遠於良醫。又似盲者，失所牽導。我等既去無上法王，煩惱之賊，日見侵逼。唱此言已，悶絕懊惱，不能自禁。

時，鳩尸那城諸力士眾，皆悉勇健，猶如香象。既見如來入般涅槃，神情憔悴，如病新起。

當於爾時，大地震動，天鼓自鳴，四大海水波浪翻倒，須彌山王自然傾搖，狂風奮發，林木摧折，蕭索枯悴，駭異於常。

爾時，大梵天王即說偈言：

過去與未來	及以今現在	無有諸眾生	不歸無常者
如來天人尊	金剛身堅固	猶不免無常	而況於餘人
一切諸眾生	愛惜保其身	薰餘以香花	不知當毀滅
如來金色身	相好以莊嚴	會亦當棄捨	應入般涅槃

永斷諸煩惱 成一切種智 猶尚不得免 況餘結累者

爾時，天帝釋即說偈言：

一切諸行性 實是生滅法 兩足最勝尊 亦復歸於盡

三毒熾然火 恒燒諸眾生 無有大悲雲 誰能雨令滅

爾時，阿菟樓駄即說偈言：

如來於今日 諸根不搖動 心意會諸法 而棄於此身

恬然絕思慮 亦復無諸受 如燈盡光滅 如來滅亦然

爾時，阿難即說偈言：

大地忽震動 狂風四激起 海水波翻倒 須彌寶山搖

天人心悲痛 泣淚猶如雨 皆悉大恐怖 如被非人執

由佛般涅槃 故有如此事

爾時，眾中有未得道比丘、人、天，既見如來已般涅槃，心生懊惱，宛轉于

地。已得道者，深歎世間無常之苦，悲號啼泣，不能自勝。

是時，阿菟樓駄語諸比丘及以天人：汝等不應生大憂惱。如來前已為汝等說「諸行性相，法皆如是。」云何猶故而悲泣耶？

爾時，阿難即便普語四遠來眾：如來今已入般涅槃。

爾時，眾人聞阿難言，悲號啼泣，悶絕懊惱。而以微聲語阿難言：今此人眾極為闐塞，三十二喻闍那皆悉充滿。惟願，尊者！各令我等，次第得前，親見如來，最後瞻仰，禮拜供養。如來出世，難可值遇，如優曇鉢花時時乃現。今者，親在此般涅槃。願必哀愍，令我得見。

爾時，阿難聞眾人言，心自思惟：如來出世，極為難值。最後供養，亦復甚難。我今當令誰在於先供養佛者？今者，宜使諸比丘尼及優婆夷，得在前來供養佛身。所以然者？斯等女弱，昔來之時，不必得到如來之所。以是因緣，故宜在先。

作此念已，即便普唱：諸比丘尼及優婆夷！皆聽前於如來身所。

諸比丘尼及與無量優婆夷等，俱到佛所。既見如來已般涅槃，啼泣懊惱。圍繞禮拜，種種供養。

爾時，有一貧窮優婆夷，年一百歲。見諸婆羅門并及剎利長者居士、力士、妻女、長幼、大小，以妙香花種種供養。自傷貧乏，獨絕此願，心自思惟：如來出世，極為難值。最後供養，復為甚難。而今窮罄，無以自表。

作此念已，倍增悲慟。臨佛足上，心大懊惱，涕泣流漣，汗如來足：願我將來所生之處，常得見佛。

諸比丘尼及優婆夷，供養畢已，即還本處。

爾時，阿難又復普告諸餘人言：諸比丘尼及優婆夷供養已畢。汝等可前次第供養。

時，諸人眾以次而來到佛身所。既見如來已般涅槃，號泣宛轉，心大悲惱。

以諸供具，而用供養。

爾時，諸力士眾，皆悉集聚，共相謂言：我等今者，云何闍維如來之身？世尊臨欲般涅槃時，應有遺敕。

即便共往問阿難言：我等今者，欲共闍維如來之身，其法云何？世尊臨向般涅槃時，當有遺旨，惟願見告。

爾時，阿難語力士言：如來遺敕闍維之法，令與轉輪聖王等無有異。

阿難即便具說佛向所敕之事。

諸力士等聞阿難言，皆共嚴辦闍維之具。先造寶輿雕鏤莊麗，以如來身置寶輿上，燒香散花，作眾伎樂，歌頌讚歎。於音樂中而說苦、空、無常、無我、不淨之法。

時，諸力士白阿難言：如來今者，既般涅槃。最後供養，極為難遇。我等請留如來之身，七日七夜，恣意供養。令諸天人，長夜獲安。

阿難即便以力士言，問阿菟樓駄。阿菟樓駄答阿難言：善哉！隨意。

阿難爾時告諸力士：聽留佛身七日七夜，恣意供養。

時，諸力士聞阿難言，心大悲慶。即於林中種種供養，滿七日已。

時，諸力士以新淨綿及以細氎，纏如來身，然後內以金棺之中。其金棺內，散以牛頭栴檀、香屑及諸妙花。即以金棺內銀棺中，又以銀棺內銅棺中，又以銅棺內鐵棺中，又以鐵棺置寶輿上，作諸伎樂歌唄讚歎。諸天於空，散曼陀羅花、摩訶曼陀羅花、曼殊沙花、摩訶曼殊沙花，并作天樂，種種供養。然後次第，下諸棺蓋。

時，力士等，共相謂言：七日之期，今者已滿。我等宜應舁如來棺，周匝繞城，令諸人民恣意供養，然後往於城南闍維。

作此言已，即便共舁如來之棺，盡其身力而不能起。各共驚怪，不知何故？而以問於阿菟樓駄：我等諸人，欲舁佛棺，周匝繞城，還趣南門供養闍維。盡

竭身力，而不能舉。不知此是何等事相？惟願，尊者！為我說之。

時，阿菟樓駄語眾人言：所以然者，虛空諸天，欲令佛棺周匝繞城。從北門入，住於城中，聽諸天人種種供養。然後應從東門而出，往於寶冠支提之所，而闍維之。

彼諸力士聞此語已，共相謂言：諸天意爾，宜應順從。

即舁佛棺，繞城一匝。從北門入，住城之中。聽諸天人，恣意供養，作妙伎樂，燒香散花，歌唄讚歎。

諸天於空，雨曼陀羅花、摩訶曼陀羅花、曼殊沙花、摩訶曼殊沙花，并作天樂，種種供養。供養訖已，即便從城東門而出，往於寶冠支提之所。

既到彼處，比丘、比丘尼、優婆塞、優婆夷、天龍八部，感結悲哽，不能自勝。而便聚積牛頭栴檀及諸雜香。又於積上敷舒繒氎，施大寶帳以覆其上。舁舉寶棺，繞彼香積周迴七匝，燒香散花，作眾伎樂，而以寶棺置香積上，取妙

香油周澆灑之。

時，四部眾并諸天人戀慕懊惱，不能自勝。即便以火從下燒之，火不肯燃。乃至再三，亦復不燃。

時，諸人眾不知所以。即以此事，問阿菟樓駄：三燒香積，何故不燃？

阿菟樓駄言：所以然者，尊者摩訶迦葉，在鐸叉那耆利國，聞於如來欲般涅槃。與五百比丘從彼國來，欲見世尊。是以如來不令火燃。

爾時，大眾聞此語已，深歎奇特。

爾時，摩訶迦葉，在鐸叉那耆利國，遙聞如來在鳩尸那城，欲般涅槃。心大悲戀，與五百比丘，緣路而來。去城不遠，身患疲極，在於路邊，與諸比丘坐於樹下。見一外道，手執曼陀羅花。迦葉問言：汝從何來？

答言：我從鳩尸那城來。

迦葉又問：汝知我師應正遍知不？

其即答言：識。汝大師，在鳩尸那城娑羅林中雙樹之間，已般涅槃，得今七日。即時，正在寶冠支提，將欲闍維，天人充滿，互競供養故。我於彼得此天花。

爾時，迦葉聞此言已，悲號哽咽。諸比丘眾，悶絕躃地。而以微聲，共相謂言：嗚呼！苦哉！世間眼滅。

於是，迦葉而安慰之：汝等不應作此苦惱。諸行性相，皆悉如是。如來天尊猶尚不免，況復餘人而得脫耶？宜應精進求離世苦，今可速起，前於寶冠支提之所，禮拜瞻仰。

爾時，眾中有餘比丘，晚暮出家，愚癡無智，共相謂言：佛在世時，禁呵我等不得縱意。既般涅槃，何其快哉！

是時，迦葉與諸比丘進鳩尸那城，到於寶冠支提之所，見如來棺在香積上，悲泣流淚，圍繞七匝，而登香積。至寶棺所，在於足處號咷鳴咽，頭面作禮。

爾時，如來於寶棺內，而出雙足。迦葉見此，倍增悲驚。

時，諸天人既覩奇特希有之事，莫不嗟歎，深生苦戀。

爾時，迦葉見佛足上，而有點汙。即便迴顧，問阿難言：如來足上，何緣有此？

阿難答言：如來初可般涅槃時，四眾充滿。我時思惟：「若令大眾，同時進者，女人羸弱，不必得前。」即便先聽諸比丘尼及優婆夷到如來所禮拜供養。爾時，有一貧窮優婆夷，年一百歲，見諸婆羅門，及以剎利長者居士、力士妻女，長幼大小，以妙香花種種供養，自傷貧乏，無以表心。作此念已，倍增悲慟，臨佛足上，心大懊惱，涕泣流漣，汙如來足。

爾時，迦葉既聞此語，心懷惆悵。怪責阿難曾不呵止致此點汙。即以香花，供養佛棺，禮拜讚歎。皆悉畢已，於是雙足自然還入。迦葉即便還下於地。以佛力故，香積自燃，四面火起，經歷七日，寶棺融盡。

於時，諸天雨令火滅，諸力士眾收取舍利。以千張氎纏佛身者，最裏一張及外一重，如本不燃，猶裹舍利。當爾之時，虛空諸天雨眾妙花，并作伎樂，歌唄讚歎，供養舍利。

時，諸來眾及以力士，皆悉各設種種供養。

諸力士眾即以金甕收取舍利，置寶輿上，燒香散花，作眾伎樂，還歸入城。起大高樓，而以舍利置於樓上。即嚴四兵，防衛守護。唯聽比丘及比丘尼得入禮拜種種供養，其餘國王及婆羅門長者居士，一切人民，皆不聽前。

爾時，韋提希子阿闍世王聞「彼力士收佛舍利，置高樓上，而嚴四兵防衛守護。」心大悲惱。又復忿怒諸力士輩，即便遣信，語力士言：世尊在世，亦是我師。般涅槃時，恨不臨見，我之族姓，及與世尊，皆是刹利。汝今云何獨收舍利置高樓上，而嚴四兵防衛守護，不分餘人？汝便可以一分與我，我欲於國起妙兜婆，興諸供養。若能見許，永通國好。不見許者，興兵伐汝。

餘七國王及毗耶離、諸離車等，遣使之法，皆亦如是。

時，婆羅門、長者、居士，亦各遣信，白力士言：世尊亦是我等之師。願能哀愍，賜舍利分。

時，諸國使到力士所，具宣王意。力士聞已，深懷不平。答諸使言：佛來我國而般涅槃，舍利自然應屬我等。欲於國界興造兜婆莊嚴供養，此不可得。若兜婆成，恣汝等意快，共來此供養禮拜。若欲興兵而見向者，此國軍眾，亦足相擬。

時，彼諸使各歸本國，人人向王說如此事。諸王聞已，益懷瞋忿，各嚴四兵而往攻伐。時，諸力士亦嚴戰具，以擬來敵。

鳩尸那城中，有一婆羅門，名徒盧那，聰明多智，深信三寶。心自思惟：彼八國王及諸離車，身力壯健，軍眾精銳。又且力士，勇猛難當。若交戰者，必無兩全。而即便語諸力士言：汝等雖復勇銳果敢。彼八國王，齊力同心，人眾

雲集，軍陣猛盛。若戰鬥者，理無兩全。鋒刃既交，必有傷害。如來在世，教人行慈。而於今日，忽相殺戮。汝等不應憫惜舍利，宜分諸國及離車等，各於其界，造立兜婆。稱於世尊往昔之訓，又使汝等普獲福利。

諸力士眾，聞此語已。心意解悟，即答之言：汝之所說，實得於理。聽如汝言。

彼婆羅門見力士眾皆悉解甲，即便出城。語諸王言：汝今為法，何故興兵？

諸王答言：我為法故，遠求舍利，而見拒逆，不肯分與。是以今者，興兵共來。

時，婆羅門復語王言：我已相為和，諸力士皆悉與汝舍利之分。可取寶瓶，為汝分之。

八王歡喜，奉授金瓶。彼婆羅門受諸金瓶，持以還歸。於高樓上而分舍利，以與八王。

于時，八王既得舍利，踴躍頂戴，還於本國各起兜婆。
彼婆羅門，從諸力士乞分舍利瓶，自起兜婆。
諸力士等，取其一分，於闍維處，合餘灰炭，而起兜婆。
如是凡起十處兜婆。
如來從始欲般涅槃，及般涅槃後至於闍維，起諸兜婆，其事如是。
其後，迦葉共於阿難及諸比丘，於王舍城，結集三藏。

大般涅槃經

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道



妙法寺 香港新界屯門藍地

🌐 mfbm.hk